

## 112 年全國語文競賽客家語朗讀文章國中學生組（海陸腔）

編號 1 號

### 【線上學習】李秉璋原作

神奇、神奇盡神奇，上課毋使趕，交通毋會塞，想愛學麼个斯學麼个。先生任僱擇，時間任僱選，三更半夜乜做得，先生講到生趣又清楚。佢做得係學生仔个先生，乜做得做先生个先生，總講佢桃李滿天下，毋使準備拜師禮，毋使繳學費，你想愛學，佢斯會教。

不管你係巧神<sup>1</sup>抑係蠢當<sup>2</sup>，佢全都收。佢無擇學生仔、無擇時間、無擇地方，單單擇你，擇你想愛學个心。這係學習个革命，這係時代个轉變。來著急、來著遽，跔得著大進步，斯像臉身脣有仙人指點，武功大進。

馬桶毋曉修理有人教，鏈鋸毋曉發，一步一步來，秘訣<sup>3</sup>教你知。網路線个接頭線路毋曉排，有人教你色目愛分明，五彩六色照順序，工具又特別，頭尾一下摻佢夾落去，接頭插好網路就通。

雖然講一隻銀角仔毋會響，毋過先生大部分都係自家在該做

戲，講到口水波潑、精神飽滿、歡頭笑面，斯像毋會恹合有耐心！一遍教毋會，過教一遍，你想愛學幾多回斯學幾多回，學到你自家毋愛學。

千里緣分一線牽，天下全在僱彈指之間。現代生活當舒適，冷氣吹，彈指間，毋使出門、毋使尖車，想愛仰般學斯仰般學。就算係疫情時節，學校个線上教學，有一息無恹自由，毋過乜有人非常認真，一片聽課，一片查資料，正經係講一知三，師傅渡入門，修行在個人。上課講義自家留，毋使抄，三隻快速鍵一揸，滑鼠一箍，講義黏時留下來。

當日上課紀錄先生有錄製，驚你單單係「用手機上課定」，人毋知走哪位去。所以先生上課會問問題，一半問，一半係在該點名，看你心思有在這無？認真上課个，回答無問題，又講頭斯知尾，無用心个乜無問題，平平無問題，這個係毋知半項，所以無問題。連先生喊佢回答，佢也像在人間消失，無鏡頭、乜無回答聲，訊息欄裡肚乜無留字，所以佢正經係「用手機上課定」。

線上學習，成就隨在人，逐儕有選擇个自由，斯愛對自家个人生負責定。對自家未來正經个慷慨，就係摻一切都貢獻分現時。今日个僱，成就韶早个僱。

<sup>1</sup> 巧神：音 kiauˊ shin；聰慧，屬具特殊能力的聰明。

<sup>2</sup> 蠢當：音 ngongˊ dongˊ；呆愚、傻呼呼。

<sup>3</sup> 秘訣：音 biˊ gied；訣竅，指事物的要領、竅門。

【火燒崗頂】李宜諭原作

在鄉下，鬧鬧熱熱个舊曆年一過啊忒，又伸著恬靜个生活。毋過，行過消防隊時節，會看著該一臺一臺个消防車駛出車庫停在路脣，雖然看毋著無閒直掣个身影，乜聽毋著緊張刺耳个警報聲，毋過，空氣裡背因等一息仔愛停動个電波，一種神經擱纏个氣氛。

舊曆二月係美濃人掛紙个時節，恁多年天時反常，春雨慢到，二月个崗頂燥絲絲仔，所以，第一隻拜六掛紙个臨暗仔開始，就會看著崗頂出現冲天个煙，續下來紅紅个火蛇就颯出來咧，阿姆哀喲，火燒山哩喲！消防車个身影像走相追樣舂等出，警報聲在街路咻等過<sup>1</sup>，一臺、兩臺、三臺……總概出動，毋過，斷烏過後就難耐咧，高不將換手腳流掠个阿兵哥，擎等鑷仔、刀嫵膠附近个竹頭、樹仔、草劈出斷火路。

第二日打早，「轟……叮叮叮叮、叮叮叮叮」直升機个聲音就在天頂來來去去響無停。「直升機去美濃湖舀水咧喲！」美濃湖黏時鬧熱起來，大家遽遽號隻好位仔，坐下來定定仔看等直升

機在湖面舀水个景象。遠遠飛過來个直升機，會到美濃湖个時節，就會慢慢仔降下來，等到肚屎下背个大袋仔揆著<sup>2</sup>水面，佢就會煞煞膠袋仔向前拖一下正擲起來，淦淦一大袋个水就吊起來咧，續等膠這恁大袋个水晃晃激激<sup>3</sup>吊到廣善堂背个山崗頂，對半天高倒啊下，恁大袋个水黏時化做一陣白白个濛煙散淨淨。

天頂个直升機一輪又一輪，對打早飛到斷烏；山腳下消防車个水一管又一管緊洩；崗頂紅紅个影跡對山前遶到山背、對山坪遶到山頂。更深夜靜个暗晡，總會聽著竹頭燒到劈哩叭啦<sup>4</sup>響个聲，火屎就跔等風滿哪仔飛，天光時節，家家屋屋个屋頂還過大路、田肚全全係烏烏个火屎。崗頂个火日燒夜燒，山下个消防車、救護車、阿兵哥乜日夜掌等……下把仔伸著冲天个白煙，大家想愛歇睏一下个時節，紅紅个火尾<sup>5</sup>嘎又好恬恬仔颯出來，就恁樣一直愛燒到掛紙結束。

火燒山崗對環境、對山林个破壞非常大，看著劈竹頭个阿兵哥分樹杈仔劃到手膠面都血流血著，實在分人毋盼得，掛紙个方式係毋係需要鄉親好好來思考、參詳呢？

<sup>1</sup> 咻等過：音 hiu nen' go~；疾駛而過。

<sup>2</sup> 揆著：音 dud do'；碰觸到。

<sup>3</sup> 晃晃激激：音 gong gong geb` geb`；因搖晃使得水從容器中溢出來。

<sup>4</sup> 劈哩叭啦：音 pi li pa la；竹子燒裂的聲音。

<sup>5</sup> 火尾：音 fo' mui`；火焰的頂端。

112 年全國語文競賽客家語朗讀文章國中學生組（海陸腔）

編號 3 號

【鷓鴣飛啊飛】張瑞玲原作

打早，日頭正對東片鷓鴣背<sup>1</sup>個後背爬起來，輝煌又晟眼個金線射落天頂。佢踪等該臺一騎斯歸路響個老自行車，來到個百果園，還話著講今晡日日頭一出斯來到這位，算當早咧！無想著，正踏落園肚，隔壁種大梨個阿權哥斯在該大聲喊咧！「喂！日頭恁高咧正到哦，敢做有事？」

唉！佢都恁早咧，還輸佢，這阿權哥係歸暗晡毋使睡係無？做麼個做得七早八早斯來到這位？心肝肚還想等，嘴町又毋肯認輸，對嘴斯應佢：「無啦！毋係來做事，係來看鷓鴣得似<sup>2</sup>啦！」

個園在龍崗圍等個窩肚，若係堵著像今晡日恁樣個好天時，打早斯會有三、四隻大鷓鴣，在四圍個山嶺頂飛啊飛仔。

撈阿權哥個嘴鼓都還言打煞，聽著遠遠個位所傳來「咻！咻！」個聲，鷓鴣出來咧！阿權哥看著鷓鴣出來，做等個山園事頭也無掛做咧，跔等一陣來搨接梨仔個工人，坐在佢該工寮個蔭影<sup>3</sup>下欣賞這齣大自然個表演。

<sup>1</sup> 鷓鴣背：音 rhau<sup>+</sup> po zui<sup>ˊ</sup>；東勢東方山峰名，華語稱鷓鴣山。

<sup>2</sup> 得似：音 ded sii<sup>+</sup>；語助詞，表確定。

<sup>3</sup> 蔭影：音 lim<sup>+</sup> rhang<sup>ˊ</sup>；樹下照不到太陽的地方。

看佢兜閑閑長長個翼胛、跔等燒氣，慢慢迂、定定仔盤，越迂越高、緊盤緊遠，背尾變成天邊個一隻烏點，當像優雅個天頂王者，對天頂看等佢兜守護個土地。

成下仔，會看著佢兜胸挺挺、目町町停在脣頭個樹樞頂高，好恬恬無聲無哨斯春往下，一瞞目轉身又飛往上，尖尖利利個爪町，拖等一尾挨著神頭個蛇哥，斯一路「咻！咻！咻！」風神哎哎<sup>4</sup>飛落密密個樹林裡肚。

又成下，看佢兜在高高個天頂盤來飛去，忽然間，兩片翼胛一收，對天頂直直粹往下，個心肝肚還想等：「這隻鷓鴣這下穩死無命咧！」毋過，看佢強強都會撞著地泥咧，翼胛一閉、利爪一伸，在頓恬個一瞞目時間，佢該雙利爪町，毋知哪時抓著一隻臘身還在該扭啊扭個大老鼠，一轉身又飛到半天高咧！

歸陣人看鷓鴣表演看到嘴擘擘仔，有人講：「難怪，在這垵山園做恁久個事，難得看著蛇哥，斯係有這兜鷓鴣守顧這搭土地，戴在這四圍個老嫩大細正有好平安生活啊！」

<sup>4</sup> 風神哎哎：音 fung<sup>ˋ</sup> shin ngai<sup>ˋ</sup> ngai<sup>ˋ</sup>；洋洋得意。

【甘蔗下个蟬仔】羅紫云原作

屋脣該埕<sup>1</sup>竹甘蔗<sup>2</sup>種幾下年咧，當大叢，斬忒又會過綻筍，繼續煞猛生到青里里仔，長目多汁，清甜好食。

逐年大體對五月開始，日日到臨晝仔，就會有一群著等青衫，當靚、當得人惜，頭大尾尖、翼長个草蟬，細細仔像手指尾恁大隻定定，黏在這長長青色个甘蔗葉下，盡命粘在該啦歌哩曲，鬧熱煎煎。佢兜總係唱等：「揸揸揸啲<sup>3</sup>——揸揸揸啲——」甜美个歌聲，一直到下晝兩點零正會煞棚，完全無喊恠。

草蟬下班，續等嫲牯蟬<sup>4</sup>跔等上棚，毋過，嫲牯蟬係黏在竹甘蔗脣該叢榮榮个苦棟樹頂，佢算係最大隻个蟬仔，臉身著等一身烏色个西裝盡派頭，大聲唱等屬於佢兜个愛戀歌：「蟬——蟬蟬蟬！蟬——蟬蟬蟬！」佢兜做下背等一臺自家製造个放送頭<sup>5</sup>，亮亮个聲放送到盡遠都聽得著。佢心情好个時節，就安腦佢兜唱歌仔當好聽，心情毋好時，又試著佢兜吵耳塞窟。但係一想著佢兜

來到這世界上，斯有短短幾日仔，就當佩服佢兜恁勇敢、恁煞猛打拚个精神，來完成唯一愛做个聲事<sup>6</sup>——傳宗接代，該就無麼个好怨嘆，也原諒佢兜个嘶咳另命咧。

在這鬧熱个時節，佢兜張凳仔恬恬坐在甘蔗脣詳細聽，還會發現佢兜毋係儘採唱个哦，曉得照順序、有條理，成時獨唱、成時合唱輪等來，像有人指揮樣，聲音有嘹亮、低沉；時大、時細，所發出个聲無幾共樣，有个較尖；有个較溫柔。其實，蟬仔有當多種，有一年、三年、五年、十三年、十七年个，長年都戴在泥竇肚不見天日。在暗摸摸个烏泥裡肚，培養破土个熱情；在多年个等待中，化地底个能量做聲量，衝破重圍飛出來，就係為著這短短幾日个自由。

佢心肝肚緊想：這埕甘蔗無落肥，敢係因為聽了蟬仔熱情嘹亮个歌聲，正緊生緊高緊榮？該恁人，也愛像蟬仔恁知足，知恩圖報，逐日天轉笠嫲花，這一生人就多姿多彩咧！

<sup>1</sup> 埕：音 pu；量詞，堆。

<sup>2</sup> 竹甘蔗：音 zhug gam` zha`；綠皮的甘蔗。

<sup>3</sup> 揸揸揸啲：音 rham+ rham+ rham+ rhi；草蟬的叫聲。借字。

<sup>4</sup> 嫲牯蟬：音 ma gu` sham；此指臺灣熊蟬。

<sup>5</sup> 放送頭：音 fong` sung` teu；麥克風。

<sup>6</sup> 聲事：音 shang` she+；工作。

【 盞蜂叨著記 】 李政暉 原作

分盞蜂仔<sup>1</sup>叨著咧！

該日朝晨去山肚巡水做事，無看著路脣个竹林頂高有大蜂竇，乜無細義撞著該支竹仔，佢兜就尋著佢。惡豺豺个蜂仔黏時斯飛在佢脣頭迂迂轉，向等佢个臉身黏過來。佢搵開一隻看起來係盞蜂仔，驚到煞煞走，一頭退、一頭搵臉身搵頭那毛頂高个蜂仔。退到無蜂仔个位所，正感覺頭那暈暈人怪怪，遽遽行轉屋歇睏一下。

無幾久，佢个頭那、臉身、手髀搵腓下開始做下會痛，頭那感覺像雲浮在天頂，又分人縞等樣，浮浮、腫腫又合縲縲，歸隻頭那昂昂<sup>2</sup>無法度思考。左手个手巴掌腫到像紅板，手痺痺、手指尾會伸毋會勾；坐毋核、睡毋得，唉唉唧唧實在艱苦，係做得，斯想囡到泥竇肚去。

最尾分人送去醫院掛急診，講著有十過隻蜂仔叨著佢了後，醫生當認真搵佢講：「一般來講，分盞蜂仔叨著二十針以上，斯可能有生命危險，這種个蜂仔無解毒个血清、較傷重个成時會引

起過敏性个失氣無斯溶血个症頭，最好愛先通知你屋下人。」醫生安排吊大笏射<sup>3</sup>、注射搵抽血，交代佢先歇睏一下，係有麼个所爭愛黏時講。

等佢略略仔睡一下過後，感覺好盡多斯想愛轉去。毋過醫生愛佢過歇睏一下觀察看啊，最好等屙尿个尿水色正常正好轉，若係變烏暗个泥色，斯較麻煩愛送大醫院，愛一直等到無麼个问题正做得出院。最尾都無問題咧，醫生還係掛心講：「開个藥仔愛照三餐食，有哪位無鬆爽就愛煞煞過來哦。」

轉屋下換衫褲正知總共叨著十六針，兩支手髀發炎紅腫，非常痲<sup>4</sup>。左手个手巴掌還係紅腫無感覺、頭那暈暈想愛睡。睡到半夜緊爪，痲到硬硬愛搵皮掀開、爪到骨髓去。食藥仔、膏藥仔無麼个效，堵好有人紹介講臺灣有一種牛樟菇做得強肝解毒，無定著對蜂毒有效，當神奇，食了該暗晡斯盡好睡毋會痲咧。

這下蜂仔叨个位所已經結疔咧，看著這兜堅疔又過一擺分佢想著：該時節、該兜蜂仔，佢一個人在山肚有幾危險！

<sup>1</sup> 盞蜂仔：音 ang` pung` er；虎頭蜂。

<sup>2</sup> 昂昂：音 ngong ngong；頭昏神智不清。

<sup>3</sup> 吊大笏射：音 diau` tai` gong sha`；吊點滴。

<sup>4</sup> 痲：音 hoi；癢。

112 年全國語文競賽客家語朗讀文章國中學生組（海陸腔）

編號 6 號

### 【金黃色个旅行】曾雪蓉原作

旅行係一種當好个休閒活動，做得分人心情鬆爽，又做得膠最靚个回憶留下來，另外旅行也係一種學習，有一句話講：「行萬里路，贏過讀萬卷書」，在旅行个時節，一路看著个、聽著个，可能比在書實肚學著个還較精彩、生趣。

在印象裡肚，佢最懷念个一擺旅行，係前幾年俾八月半个時節，爺哀帶佢歸屋下人去花蓮遠寮。

佢兜來到花蓮富里个六十石山，一路上感覺花蓮个空氣特別好，一聲又一聲大鷄婆歡喜又自在个歌聲，響在彎彎幹幹个山路叮，佢兜盤飛在高高个雲頂，打開梟雄个翼胛，無分日夜在這遍山頭巡邏，佢兜係這遍天地个山大王，也係保護者。

等阿爸膠車仔停在忘憂亭，佢一下車就看著滿山滿坪个金簪花<sup>1</sup>開到當鬧、當打眼，想起識在電視裡肚看過一隻紹介花蓮金簪山个節目，講這位係一隻靚到會分人「發狂」个所在，這句話正經半點都毋會爭差。在佢企在這高高个涼亭時節，看著歸遍个山頭，變成金黃色个世界，帶等泥香、野花香个山風在對面吹過來

該下，毋知仰般，佢个心肝頭就有一種感動還有幸福个感覺，佢想這就係大自然个力量。

阿爸講：「前人種樹後人涼，前人種竹後人搖。」這山頭个金簪花，係盡多前人開山打林開墾出來个，所以來到這邊寮个時節，愛曉得珍惜，毋單淨愛膠這美景用相片帶轉屋下，也愛膠自家个垃圾處理好，恁樣年年正有靚靚个風景好欣賞啊！

在夕陽像一隻啾紅个柑仔，掛在天邊个時節，本旦開到盡有精神个金簪花，像約定好共下下班樣，全眨等目珠互相偎憑，恬恬仔睡忒咧；難怪金簪花又安到「一日美人」，佢跔等朝陽跣床，又在日頭落山時節，合起佢錫人个花裙，做一隻靚一日个美人。

時間過忒盡久，成時佢還係會想起該擺「金黃色个旅行」，當像又聽著大鷄婆歡喜个歌聲，盡久……盡久。

<sup>1</sup> 金簪花：音 gim` zam` fa`；金針花。

112 年全國語文競賽客家語朗讀文章國中學生組（海陸腔）

編號 7 號

### 【盡風神个社團活動】劉純汝原作

兩年前正開學時節，拿著社團選擇單，哇！一拖拉庫<sup>1</sup>呢，有服務隊、排球隊，還有童軍團、熱舞社……，該兩時，毋知選哪隻正好？欸！「西洋劍隊」，佢目珠一金，仰恁沙鼻、恁風神个名仔喎？「嗯，就選你咧！」

這下想起入團隊个第四隻月，佢總算有機會參加全國比賽。換佢上場咧，劍衫拉好勢，面落仔摻手袋仔乜戴好勢，夾起電衫跔正馬步，盡拚囉！比賽一開始，佢拿等劍盡命牯滑步搶前進攻，使出蠻力拂啊拂仔。盲知，佢長刺佢撥擋、佢飛刺佢敲劍……，阿姆哀！總係分佢閃淨淨，戰術乜分佢看透透！佢當緊張，手腳亂忒咧，節奏乜亂忒咧；對手密密咻！咻！咻！咻，佢嘎緊揮空緊失分，輸到貼貼！

佢一比煞，軟怠怠个雙腳黏時就跪落地，無命个「啊」一聲，就像氣凹凹个相打雞，落喪落喪<sup>2</sup>！原旦个自信怕係走到天頂摻白雲搞園人尋去咧！

貼心个劍隊伴仔，全都行兼佢——有人送涼水、有人撚背

囊、還有人摻佢捕纏纏，教練乜柔柔仔安慰佢講：「人生有時星光有時月光，你打到當慶咧，下二擺再過加油！」目汁強強會忍毋核个佢，深深感受著佢兜當像冷天个細日頭，佢心肝肚黏時燒暖燒暖！

人講：「臺頂三分鐘，臺下十年功。」正經有影，聽起來恁風神个「西洋劍」，做起來無恁該！除忒考反應、比體力，還愛動腦筋、想戰術。這兩年來，一擺又一擺毋係你贏就係佢輸个比賽，分佢學習著：仰般面對失敗、面對毋堪斗个自家；仰般面對問題、解決問題。佢當煞猛打拚，發揮客家人硬頸精神个本等，練好基本功，抓捉要領，十年接一劍！佢个劍術緊來緊進步咧，武藝比得古代个花木蘭哩啲！

「西洋劍」係源自十七世紀个歐洲，乜係奧運項目之一；有分鈍劍、銳劍、軍刀三種，競賽員在比賽時節，企在金屬枋仔頂高个兩片析準備等，用劍頭先刺著對手有效个部位就算得分，嶄蠻有速度感摻爆發力。

「西洋劍」毋單淨培養專注力、思考力，還有觀察力摻判斷力，還係「盡風神」个社團活動唷！

<sup>1</sup> 拖拉庫：音 to<sup>+</sup> la ku<sup>~</sup>；語源於日語「トラック」，卡車，此文形容很多之意。

<sup>2</sup> 落喪落喪：音 log<sup>`</sup> song<sup>`</sup> log<sup>`</sup> song<sup>`</sup>；表垂頭喪氣之意。

112 年全國語文競賽客家語朗讀文章國中學生組（海陸腔）

編號 8 號

【 崁下該頭杳仔樹 】徐秀英原作

戴在鄉下，屋脊種有幾頭樣仔<sup>1</sup>樹、牛眼樹、杳仔樹，係當平常个，一到打子个季節，管佢有熟也無熟，總愛食得得个東西，細人仔絕對無放佢煞。若係吵著睡當晝个叔公、叔婆，分佢大聲追走，該下晝就無戲好唱咧。

佢屋下就在伙房个最尾析，崎仔溜啊下就係礮崁，崁下个圳溝係細人仔熱天个天堂，洗身仔、庠魚仔、捉蝦公、釣蛤蟆蚱仔，想得到个空頭，麼个就搵得著來搞！該頭杳仔樹就對崁下个石壁生出來。

阿婆當好食這頭个黃杳仔，見看著杳仔會食得該駁仔，佢就會怙等拐棍仔行兼來摺佢這兜細孬仔講，青杳仔食了會屙硬屎，愛等佢黃正好食。細人仔嘴町應講好，一群豺狗哪管得核<sup>2</sup>佢兜該張嘴，幾雙賤手摘著个，全部就拿來塞嘴空咧。該兜生到忒樹尾摘毋著个，阿爸就會擎竹篙又去剪下來，較硬个佢會自家食忒，較熟个佢會放到米缸裡背，翕加兩日仔正拿去阿婆間肚。無牙齒

<sup>1</sup> 樣仔：音 son`er；芒果。

<sup>2</sup> 管得核：音 gon`ded hed`；管得住。

个阿婆，糜<sup>3</sup>啊糜仔，面町滿足个笑容，到這下佢都還記得。

該頭杳仔樹頂，長下會有青啾仔<sup>4</sup>飛來作竇。青啾仔毋驚人，佢兜在樹下搞份家啦，佢在樹頂啾啾滾飛來飛去。細人仔雖然番綻，毋過從來毋識去撞過佢个竇。較盤擎个會蹶上石壁去算看仔，鳥竇裡肚有幾多隻卵。一駁仔後，樹頂又加加幾下隻得人惜个細鳥子咧，就恁樣生生不息。

樹頂乜有膨尾鼠跳上跳下，還有共樣毋驚人个山狗太、狗嫲蛇趕來趕去。膨尾鼠尾絨絨，當得人惜，屋下食伸个果子抑係果仁、果皮放在樹下，佢兜會輪等跳過來食，咕嚕咕嚕个目珠仁迂迂轉<sup>5</sup>，就像驚人來搶食樣，實在還生趣。山狗太、狗嫲蛇就無恁得人惜咧，因為佢个皮膚有保護色，在佢摺樹梗抑係燥葉仔俵兼个時節，一無注意就會分佢嚇著，所以佢盡惱山狗太。

恁多年過去咧，崁下該頭杳仔樹早就無在咧，毋過，該童年个回憶，哪久就恁香甜个囤在佢心肝肚。

<sup>3</sup> 糜：音 moi`；指因沒有牙齒而用牙齦磨食物。

<sup>4</sup> 青啾仔：音 ciang`ziu er；綠繡眼。

<sup>5</sup> 迂迂轉：音 din`din`zhon`；轉來轉去。